
KONTROL MOZIOA

Emakumeen Etxea Amara kaleko 11, 13 eta 17an jartzea

EH BILDU udal taldeko zinegotzi Sandra Barrenetxea Diezek, Udalbatzaren Organo Araudiaren 98. artikulua ematen duen babesa aintzakotzat hartu eta KONTROL MOZIO hau aurkeztu du, Osoko Bilkuran aztertzeko, Pertsonentzako Zerbitzuen Batzordeak ekainaren 16an izan zuen bileran **Emakumeen Etxea Amara kaleko 11, 13 eta 17an jartzearen** gainean egindako interpelazioaren ondorioz.

JUSTIFIKAZIOA

Donostiako Emakumeen Etxearen egoerak kezka eta ezinegona sortzen die nola herritarrei, hala elkarte feministei eta emakumeen elkarteei ere. Eta herritarrei eta elkarteei ez eze, baita zerbitzua baldintza desagoki eta ekipamendu publiko batean oinarritzat jo behar diren baldintzak oztopatzeko moduko batzuetan eman behar duen profesional taldeari ere. Izan ere, denok dakigu leku txikia dela hura, eta ez duela ez hara joaten diren emakume guztiei arreta unibertsala eta kalitatekoa bermatzeko moduko irisgarritasunik eta baliabiderik ere. Udaleko talde politiko guztiok uste dugu beste leku bat izan behar duela, eta, hala, behin baino gehiagotan jorratu dugu batzordeetan eta osoko bilkuretan.

Horrela, 2023ko maiatzaren 3an, Udalaren Osoko Bilkurak erabaki zuen Udalak Amara kaleko 11-13 eta 17 zenbakietako eraikinetan izango dituen lokaletan izango zela Emakumeen Etxea berria. Orobat, Gobernu honen programak konpromiso esplizitutzat jasota du "Amara kaleko egoitza berri batean birkokatzea Emakumearen Etxea".

2024ko uztailaren 19an, txosten bat egin zuen Berdintasun Sailak, instalazioek zer ezaugarri izan behar dituen zehazteko, ekipamendu publiko horretan ematen diren zerbitzuak emateko modua izango bada; eta atera zuen ondorioa da gutxienez 1.000 m² izan behar dituela.

Udal gobernuak behin baino gehiagotan erantzun du konpromisoa irmoa dela; eta batean, baita 2024ko irailean hasiko zirela obra lizitatzen ere adierazi zuen, eta 3 urte beharko zirela obra izapidetu eta egiteko.

Hala ere, epe horiek atzeratu egin zirela eta, Berdintasun Kontseiluak 2024ko azaroan izan zuen bileran beste leku bat ere izan zitekeela azaldu zuten: Lizarra kaleko lokal bat. Emakumeen Etxearen elkartearen arabera, ordea, lokal horrek ez ditu Berdintasun Arloak egindako txostenean adierazitako baldintzak betetzen: zentraltasuna, irisgarritasuna eta behar adina aireztapen eta argitasun izatea, besteak beste.

Bestalde, azkeneko hilabete honetan, hartu-eman txanda bat egiten hasi da Emakumeen Etxearen Elkartea, eta adierazi du oraindik ez duela azalpenik jaso proiektuaren egoeraz –proiektua egiteko epeen atzerapenaz–, eta balio duen proposamenik ere ez duela jaso. Era berean, adierazi du gero eta erabiltzaile gehiago dela Emakumeen Etxean, eta lekua, emakumeek parte-hartzeko bidea emango duen lekua izan beharrean, oztopo bihurtzen ari dela.

Hori dela eta, orain asko ez dela, berriro aztertu dugu gaia, bai Berdintasun Kontseiluan, bai eta Pertsonentzako Zerbitzu Batzordean ere. Berdintasun Kontseiluan, Ane Oyarbide ordezkariak adierazi zuen martxan jarri gabe jarraitzen duela obrak, eta ez zekiela epe zehatzik. Pertsonentzako Zerbitzuen Batzordean, Nekane Arzallus ordezkariak bai, epe bat behintzat aipatu zuen, edo eperik ez izatea, hobeto esanda.

Xehetasun-azterketa egiteko eta izapidetzeko, urtebete baino gehiago beharko da, eta hori egin behar da aurrena: proiektua idaztea kontratatu, proiektuak dakarren obra kontratatu, obra egin eta, azkenik, lekuz aldatu baino lehen. Horrenbestez, legegintzaldia amaitu aurretik ez da Emakumeen Etxea lekuz aldatuko, nahiz eta bideratuta izan litekeen. Gainera, ez dago argi Emakumeen Etxea han izango denik ere; Berdintasun Sailak egindako txostenean adierazitako "beharrak kabitzen diren" ikusi beharko baita horretarako.

Horiek horrela direla, hauxe da EH Bildu udal taldeak dakarren **KONTROL MOZIOA:**

- 1.- Donostiako Udaleko Osoko Bilkurak gobernu taldeari eskatzen dio legegintzaldia amaitu baino lehen zehazteko Emakumeen Etxearen leku berriaren gainean bete beharreko konpromiso berria edo konpromiso berriak.
- 2.- Donostiako Udaleko Osoko Bilkurak gobernu taldeari eskatzen dio Emakumeen Etxearen Elkartarekin biltzeko, gai horren egoera aztertzeko eta izan daitezkeen irtenbideak adosteko.
- 3.- Donostiako Udaleko Osoko Bilkurak gobernu taldeari eskatzen dio Emakumeen Etxeak dituen premientzako moduko alternatibak bilatzeko eta proposatzeko.

Donostian, 2025eko maiatzaren 20an

Sandra Barrenetxea Díez
EH Bildu udal taldeko zinegotzia